

Penyampai : TAN SRI DATO SERI AHMAD SARJI BIN ABDUL HAMID  
Tajuk : SEMINAR ISLAM DAN WAWASAN 2020: KE ARAH PENINGKATAN KUALITI UMMAH  
Lokasi : KUALA TERENGGANU.  
Tarikh : 09-04-1994

Islam mementingkan semoga kualiti dan mutu Pencapaian ummah dalam kesemua bidang hidup bernegara sentiasa berada pada tahap yang paling tinggi pada setiap zaman dan tempat.

Gasasan teori yang boleh dikembangkan dari sumber ilmu Islam mampu membentuk ummah pada masa kini mencapai kejayaan yang komprehensif. Sebagai satu sistem hidup, Islam sepatutnya dijadikan panduan dalam mewujudkan sebuah tamadun yang mulia.

2. Dalam keadaan realiti semasa, kualiti ummah belum dapat dianggap sebagai yang boleh dibanggakan. Rata-rata umat Islam kini berada pada keadaan yang sangat mengecewakan. Ini disebabkan umat Islam gagal memiliki wawasan yang jauh dan progresif serta kemampuan merancang dan melaksana pembangunan negara dengan cara yang berkesan.

3. Kualiti adalah satu konsep yang berbentuk multi dimensi dan dinamik di mana ia merangkumi kesemua aspek pencapaian usaha manusia dalam meningkatkan akhlak, mutu keilmuan, hidup berdisiplin, bersikap positif dan inovatif, kreatif, rajin dan produktif dalam menjalani tugas. Ciri-ciri tersebut perlu dimiliki oleh setiap umat Islam dalam era globalisasi yang sangat mencabar dan penuh dengan saingan dari masyarakat antarabangsa. Tanpa menghayati ciri-ciri tersebut umat Islam akan terus bergantung kepada kejayaan orang lain.

4. Hasrat Kerajaan melalui Wawasan 2020 untuk melahirkan masyarakat yang mempunyai keyakinan diri dan mempunyai nilai-nilai moral dan etika yang utuh, hidup dalam masyarakat yang demokratis, liberal lagi bertolak ansur, penyayang, adil dan saksama ekonominya, progresif dan makmur, dan sepenuhnya menguasai ekonomi yang mampu bersaing, dinamis, kukuh serta mempunyai daya ketahanan adalah usaha ke arah mewujudkan ummah yang berkualiti. Gagasan Wawasan tersebut perlu didukung dan dilaksanakan.

5. Asas yang utama kepada kejayaan Wawasan 2020 ialah kemampuan negara mengintegrasikan nilai akhlak kemanusiaan dan mewujudkan individu yang berkepakaran dalam usaha membangunkan ekonomi negara. Akhlak adalah pra syarat kepada pencapaian kualiti, dan kepakaran ilmu dalam kesemua urusan profesional adalah mekanisme ke arah kecemerlangan tersebut.

6. Dalam keadaan semasa, adalah menjadi satu tuntutan bagi sesebuah negara, khususnya negara Islam seperti Malaysia perlu berusaha untuk memajukan ekonomi negara bukan sekadar untuk menyelesaikan masalah kemiskinan tetapi hendaklah berusaha dengan penuh perancangan untuk mencapai taraf ekonomi maju yang mampu menghayati kemerdekaan sebenar dan seterusnya boleh mempengaruhi perjalanan orde baru dunia.

7. Dalam era semasa di mana kuasa ekonomi sangat penting, pelaksanaan dan penghayatan Islam akan hanya dapat diwujudkan dari kedudukan kekuatan ekonomi umat Islam.

8. Saya berharap seminar ini yang dianjurkan bersama oleh Kerajaan Negeri Terengganu dan IKIM akan berhasil memberi perspektif yang positif kepada kita untuk meneruskan usaha meningkatkan kejayaan ke arah peningkatan Ummah bersesuaian dengan aspirasi wawasan 2020.

9. Dengan kata-kata tersebut saya sudahi ucapan aluan dengan Wabillahi Taufiq Wal hidayah Wassalamualaikum Warahmatullahi wabarakatuh, dan selamat bersidang.